

Pameran buku, diskusi sastera **isi minda masyarakat**

Wacana, diskusi dan pameran buku serta apresiasi seni sastera menawarkan pengisian ilmiah dan literasi kepada warga Lembah Klang yang bermula hari ini hingga Ahad ini.

Pengisian bermula dengan Wacana Institut Alam dan Tamadun Melayu (ATMA) berjudul Epistemologi Kitab Tib Melayu akan diadakan di ATMA, Universiti Kebangsaan Malaysia (UKM), Bangi, pada jam 9.30 pagi ini.

Perbincangan yang akan disampaikan oleh Felo Penyelidikinya, Dr Mohamad Nasrin Mohamad Nasir itu, akan membicarakan epistemologi kitab perubatan Melayu dalam tradisi bangsa dan falsafah yang mendasari penulisan berkenaan.

Bicara Karya: Himpunan Sera-

tus Sajak Kepada dan Keroncong Pulau Kelapa akan diadakan di Institut Terjemahan & Buku Malaysia (ITBM), Wangsa Maju, Kuala Lumpur, jam 3 petang esok.

Karya yang masing-masing dihasilkan oleh Marzuki Ali dan Wikunila MS itu bakal dikupas serta disorot oleh Pensyarah Universiti Selangor (UNISEL), Prof Tengku Shahrom Shahdan dan Pengurus Besar Penerbitan, TV AlHijrah, Zainal Rashid Ahmad.

Tirai acara Sabtu dibuka dengan program Adrenalin: Stimulasi Buku & Seni di Kafe Buku Oakheart di 1-61, Jalan 8/35, Seri Bangi, Seksyen 8, Bangi, bermula jam 10 pagi hingga 11 malam.

Program ini bukan hanya menampilkan jualan buku,

majalah dan zine, bahkan Pentas Asonansora yang bermula jam 4 petang; GelanggangOakheart #11 (5 petang) dan Secawan Wayang: Tayangan Telefilem Melur vs Rajawali (8.15 malam) serta Ngopi Bersama Pengarah Telefilemnya, Al Jafree Md Yusop dan penulis buku Membedah P Ramlee, Daniyal Kadir.

Pameran, pelancaran buku

Majlis Perasmian Pameran Olah: Gabungan Pelukis Cat Air Malaysia di Creative Space, Lembaga Pembangunan Seni Visual Negara (LPSVN), Kuala Lumpur, jam 11 pagi Sabtu ini.

Pameran yang sedang berlangsung sehingga 10 April ini, menampilkan karya pelukis seperti Shaarim Saat, Hisham

Salmin, Padi Razak, Abey Zoul, Maroz Khuzaini, Ryzal Misran, Shafie Hassan, Aminah Abd Rahman, Maamor Jantan dan Wan Borhanuddin Md Noor.

Pameran itu bakal dirasmikan oleh Pengerusi Kumpulan Wang Simpanan Pekerja (KWSP), Tan Sri Samsudin Osman.

Jam 12 tengah hari pula, buku Cerpen Terbaik 2015 akan dilancarkan pada Pesta Buku Antarabangsa Putrajaya di Pusat Konvensyen Antarabangsa Putrajaya (PICC), Putrajaya.

Pada jam 8 malam hari yang sama pula, Malam Inspirasi Sasterawan Negara (SN) akan diadakan di Pentas Utama Bazaar Malam Batu Muda, Kuala Lumpur yang bertujuan mengangkat martabat sastera dan bahasa Melayu, sekali

gus bertepatan dengan slogan Bahasa Jiwa Bangsa.

Program anjuran Persatuan Kebudayaan dan Kesenian Anak Soleh Malaysia (AsMal) itu, turut dimeriahkan dengan kehadiran penulis, penyair dan wakil persatuan penulis, selain anak yatim Siti Khadijah.

Pada Ahad pula, Wacana: Islamisasi Ilmu & Fiqh Tahawullat akan diadakan di Klasika Media - Akademi Jawi Malaysia di 3-1, Jalan Seri Putra 1/2, Bandar Seri Putra, Kajang, bermula jam 8 malam.

Wacana yang akan dimulai dengan bacaan Maulid al-iyā'u al-Lami' itu, menampilkan ilmuwan muda, Syed Muhiyuddin al-Attas dan Iqbal Zayn al-Jauhari.